

摘藻堂四庫全書薈要

集部

欽定四庫全書薈要

集部

大全集卷十一

詳校官候補通政司經歷臣郭祚熾



欽定四庫全書薈要卷一萬六千六百二十二

集部

大全集卷十一

明 高啟 撰

長短句體

青丘子歌

江上有青丘子徙家其南因自號青丘子閒居
無事終日苦吟間作青丘子歌言其意以解詩
淫之嘲



青丘子懼而清本是五雲閣下之仙鄉何年降謫在世
間向人不道姓與名躡屩屨遠遊荷鋤懶躬耕有劔任
繡澀有書任縱橫不肯折腰為五斗米不肯掉舌下七
十城但好覓詩句自吟自酬賡田間曳杖復帶索傍人
不識笑且輕謂是魯迂儒楚狂生青丘子聞之不介意
吟聲出吻不絕咿咿鳴朝吟忘其飢暮吟散不平當其
苦吟時兀兀如被醒頭髮不暇櫛家事不及營兒啼不
知憐客至不果迎不憂回也空不慕猗氏盈不慙被寬

褐不羨垂華纓不問龍虎苦戰鬪不管烏兔忙奔傾向
水際獨坐林中獨行斲元氣搜元精造化萬物難隱情
冥茫八極遊心兵坐令無象作有聲微如破懸蝨壯若
屠長鯨清同吸沆瀣險比排崢嶸靄靄晴雲披軋軋凍
草萌高攀天根探月窟犀照牛渚萬怪呈妙意俄同鬼
神會佳景每與江山爭星虹助光氣煙露滋華英聽音
諧韶樂咀味得大美世間無物為我娛自出金石相轟
鏗江邊茅屋風雨晴閉門睡足詩初成叩壺自高歌不

顧俗耳驚欲呼君山老父攜諸仙所弄之長笛和我此
歌吹月明但愁歎忽波浪起鳥獸駭叫山搖崩天帝聞
之怒下遣白鶴迎不容在世作狡獪復結飛珮還瑤京

登陽山絕頂

我登此山巔不知此山高但覺羣山總在下坐撫其頂
同兒曹又見太湖動我前洶湧三十萬頃煙波濤長風
吹人度層嶂不用仙翁赤城杖峰迴秋礙海鷗飛日出
夜聽天雞唱中有一泉長不枯乃是蜿蜒神物之所都

老藤陰森洞府黑樹上不敢畱棲鳥常年禱雨車來此
投金符靈旗風轉白日晦馬鬣一滴霑三吳巖巒蒼蒼
境多異樵子尋常不曾至探幽歷險未得歸忽聽鐘來
澗西寺此時望青冥脫略塵世情白雲冉冉足下起如
欲載我昇天行古來名賢總何有只有此山長不朽欲
呼明月海上來照把長生一瓢酒浮丘醉枕肱洪崖笑
開口秋風吹落浩歌聲地上行人盡回首

張節婦詞

靈壽張明府嫡母早寡守志

誰言妾有夫中路棄妾身先殂誰言妾無子側室生兒
與夫似兒讀書妾辟纊空房夜夜聞啼鳥兒能成名妾
不嫁良人瞑目黃泉下

與客飲西園花下

一壺酒正滿一樹花仍新傾壺對花樹日暮西園春不
愛枝上花愛此花下人相逢莫學花無賴明日分飛隨
路塵

吳中逢王才隨朝京使赴燕南歸

江南草長蝴蝶飛
白馬新自燕山歸
歸不堪說易
水寒風薊門雪朝
邸空隨使者車
禁閣不受書生謁
一杯勸君歌莫哀
歸時應過黃金臺
不見荒基秋來土
花紫伯圖已歇
昭王死千載無人
延國士

白雲泉

白雲不為雨散在
清泉流泉氣復成
雲山中同一秋
巖前石竇幽寒處
雲自長浮泉自注
潛龍未起出深泓
渴鳥

時來下高樹雲應無心飛上天泉亦不肯隨奔川老僧
愛此不復下山去卧雲飲此終歲年

戎王追彘圖

前騎脫兔奔後騎驚鴻急火燒秋草獵場空一彘窮追
勢難及大小當戶左右賢單于勇銳闕支妍雕戈白羽
謾爭發衆中得雋知誰先君不見天策將真天子馳一
馬殪四豕

茅山陳道士卧雲所

不逐雲渡海寧隨雲出山但邀雲共宿日夕三峰間
緼枕席潤掩靄房櫳閒聽松閣前風滿耳吹盡白雲應
睡起

贈醉樵

川釣已遭獵野耕終改圖不如山中樵醉卧誰得呼采
山不采松松花可為酒酒熟誰共斟木客為我友木客
已去空石牀舉杯向月邀吳剛借汝快斧斫大桂要令
四海增清光林風吹髮寒擁耳獨枕空尊碧巖裏此時

忘却負薪歸猛虎一聲驚不起世間萬事如浮煙看棊
何必逢神仙青松化石鶴未返酒醒又是三千年

雷雨護嬰圖

兒衣寒母衣溼風雨蒼黃歸意急雷忽鳴兒忽驚抱兒
與兒同死生樹聲吹迴水聲注田家尚遙無避處看圖
誰念亂離人白日青天棄兒去

南園

君不見平樂館古城何處寒雲滿君不見奉誠園荒臺

無蹤秋草繁白日沉山水歸海寒暑頻催陵谷改皇天
大運有推移富貴於人豈長在請看當年廣陵王雙旌
六纛何輝光幸逢中國久多故一家割據誇雄強園中
歡游恐遲暮美人能歌客能賦車馬春風日日來楊花
吹滿城南路疊石為山引泉為池辟疆舊園何足奇經
營三十年欲令子孫永保之不知回首今幾時繁華掃
地無復遺門掩愁鷗嘯風雨種菜老翁來作主空餘怪
石卧池邊欲問興亡不能語春已去人不來一樹兩樹

桃花開射堂踰圃俱青苔何須雍門琴但令對此便可
哀人生不飲胡為哉人生不飲何為哉

滄浪亭

滄浪平無風波之驚滄浪廣有風月之賞吳興長史舊
遷謫買得此水自號滄浪客垂釣在北渚榜船臨西洲
白鶴不來往遺興誰同遊發清歌弄清景醉入荷花夢
魂冷天念儒臣去國冤故與無塵水雲境斯人去已遠
我來空復情滄浪水雖在不似昔年清躊躇獨過亭前

路踈葦寒煙沙鳥鳴

石射堞

石射堞張石城石鼓響音或發石騎勢欲行彷彿古戰場
上有愁雲生餓鴟嘯寒風若若箭鏃鳴何人作此畱山
中鳥獸欲過膽盡驚疑是神禹治水時來教鬼射降妖
精至今風雨夕猶聽人馬聲嘗聞父老言鼓鳴則有兵
方今瘡痍民脫命見太平我願碎其鼓墮其堞一人安四
海清自此萬年無戰爭

走狗塘

春堤長春草淺此地吳王曾走犬獵場四面圍畫旗紅
炬照輦還宮遲割鮮夕宴誰共食臺上妃子非樊姬春
苑年來草仍綠韓盧已去多麋鹿君不見漢皇縱狗殊
有功逐兔直到烏江東

清冷閣

臨清池敞華閣明月入綺疏微風颭羅幙白波連遠洲
竹冷芙蓉愁客聽秋聲起魚驚星影流冰絃彈罷鷓鴣

曲天河墮水良宵促試問西園閣上遊何如南浦舟中宿

烏夜邨

荒邨烏夜棲忽繞月明啼生得東家女身為萬乘妻至
今種高樹不遣烏飛去居人凡幾家愛聽啼啞啞啼啞
啞勿驚怪婦開門向烏拜

醉贈宋卿

勸君歸來休莫作澹蕩遊黃雲已蔽燕國晚白露正滿

梁園秋千石酒萬戶侯請君論此誰當優吳門日出花
滿樓小婦喚客不解羞君畱綠綺琴我脫紫綺裘今朝
春好能飲否東風吹散江南愁

潘隱君月樓歌

樓高高月皓皓容月多得月早朝看西墮江夕見東生
島我歌烏雲向穹昊樓中之人須醉倒人長閒月長好
月中藥成人不老

約諸君看范園杏花不果後偶獨遊而杏已盡

落惟桃數樹盛開感而有賦因寄諸君

久欲與君往那期成獨來參差二月暮過却杏花開杏
花雖好今無在只有桃花笑相待杏白桃紅何淺深春
還不負看花心看花心君更劇莫為不來空歎息世間
萬事盡如花著意相尋應不得

番人移帳圖

懸爾弧韜我弓拔帳何徙榆林東顧語勿驅日暮中野
兒未十歲不能騎馬

夜間謝太史誦李杜詩

前歌蜀道難後歌偏仄行商聲激烈出破屋林鳥夜起
鄰人驚我愁寂寞正欲眠聽此起坐心茫然高歌隔舍
如相和雙淚迸落青燈前李供奉杜拾遺當時流落俱
堪悲嚴公欲殺力士怒白首江海長憂飢二子高才且
如此君今與我將何為

贈金華隱者

我聞名山洞府三十六一一靈蹤紀真錄金華秀出向

東南遠勝陽明與句曲樓臺縹緲開煙霞天帝賜與神
仙家靈源有路不可入但見幾片流出雲中花子房之
師赤松子三千年前亦居此飛行恍惚誰解尋漫說至
今猶不死松花酒熟何處遊瑤草自綠春巖幽羣羊卧
地散如石老鹿耕田馴似牛聞有隱君子乃是學仙者
自從入山中不曾到山下世人莫知其姓名以山呼之
不敢輕樵夫忽見苦未識只疑便是黃初平嗟我胡為
在塵網遠望高峰若天壤茯苓夜煮儻許餐鐵杖來敲

石門響

春初來

春初來柳條欲舒花未開曉日窗前鳥聲喜似報春來
喚人起東風吹煖入煙痕綠遍江南幾千里去年春去
憶愁人倏忽今年又見春但欲逢春醉杯酒不管相思
成白首

題黃大癡天池石壁圖

黃大癡滑稽玩世人不知疑似阿母傍再謫偷桃兒平

生好飲復好畫醉後灑墨秋淋漓嘗為弟子李少翁貌
得華山絕頂之天池乃知別有縮地術坐移勝景來書
帷身騎黃鵠去來遠縞素飄落流塵緇潁川公子欣得
之手持示我請賦詩我聞此中可度難玉枕秘記傳自
青牛師池生碧蓮花千葉光陸離服食可騰化遊空駕
雲螭奈何靈蹟久閔藏荒竹滿野啼猩猩尋真羽客不
肯一相顧却借釋子營茅茨我昔來遊早春時雪殘衆
壑銷寒姿磴滑不敢騎馬上青鞵自策桃筇枝上有煙

蘿披拂之翠壁下有沙石蕩漾之清漪晴天倒影落明
鏡正似玉女曉沐高鬟垂飲猿忽下藤裊裊浴鶴乍立
風澌澌匡廬有地我未到未省與此誰當奇掃石坐其
涯沿洄引流卮醉來自照影俯笑知為誰落梅撲香滿
接籬暮出東澗鐘鳴遲歸來城郭中復受塵土欺十年
勝賞難再得恍若清夢一斷無由追朝來觀此圖惻愴
使我悲當時同遊已少在我今未老形先疲人生擾擾
嗟何為不達但為高人嗤漢南已老司馬樹峴首已什

羊公碑惟應學道悟真訣不與陵谷同遷移仙巖洞府
孰最好東有地肺西峩嶠高崖鐵鎖不可攀援以逕上
仰望白雲樓觀空峩巍此山易上何乃遺便與猿鶴秋
相期欲借太乙舟夜卧浩蕩隨風吹洞簫呼起千古月
照我白髮涼絲絲傾玉醪薦瑤芝招君來遊慎勿辭無
為漫對圖畫日夕遙相思

書夢中

夢行塞下沙無水無蒹葭牧羊人歸霜草短平地鴈羣

樓不煖騎馬茫茫入遠煙一行衝起上秋天我夢驚回
鴈飛去角聲吹斷江城曙

媯蜚子歌

為友王常宗
作蓋其號也

媯蜚子乃是軒轅之裔虞鯁之孫混沌既死一萬年獨
抱大樸存竊伏在草野冥心究皇墳蚤逢三光五嶽之
氣乍分裂天狼下地舐血流渾渾鹿走秦中原蛇鬪鄭
國門俎豆棄草莽干戈歟崩奔媯蜚子便欲東遊渡弱
水沐髮滄海朝陽盆又欲西行沂河漢踰崑崙山橫川

阻兩地俱不可以往兮歸來掩戶卧旦昏蒔黍一區注
醪一樽妻給井臼兒牧雞豚不詰曲以媚俗不偃蹇而
凌尊作為古文詞言高氣醇溫手提數寸管欲發義理
根上探孔孟心下弔屈賈魂其質耀金石其芳吐蘭蓀
叩虛答有響蹶險成無痕陸珍雜水怪變狀弗可論幾
年兀兀不肯出坐待真主應運九五開乾坤鶴書自天
來幽隱初見拔使者遠造廬雞鳴起膏轄興纂金匱編
尚書為給劄奸魂泣幽塚下恐遭誅殺書成一代進紫

宸鸞旗羽衛夾陛陳閣門導謁稱小臣麻衣不脫拜聖
人捧匱近前殿龍顏喜回春勅賚內帑之金與綺段其
文織作銀麒麟蒙恩乞還家以奉白髮親戴古弁垂長
紳自號山澤之臞民媯蚩子幸際明良時無為寂默坐
老東海濬青丘有客鈍且癡與汝欲結同襟期左鼓清
瑟右吹鳴篴作歌共祝天子壽五風十雨萬國赤子同

熙熙

贈劉生歌

生善鍛為李鍊師製三
隅鐵判藥刀求歌贈之

君不見歐冶子金鑄魚腸照吳市君不見徐夫人藥淬
匕首驚函秦奇鋒當年非不利氣奪秋雲愁白帝伯圖
恃此竟無成良冶徒為殺人器何如劉生獨煉昆吾鋼
大爐夜鍛騰虹光神鍼妙刃兩如水提出二豎皆奔藏
利器之功有如此特為醫仙起人死囊中長得伴刀圭
海上何須剗犀兕我看十年太白西方明銅山尋鑿兵
縱橫幸逢聖人生干戈戢四海清願生但制此器勿制
兵民無疫癘樂太平

登金陵雨花臺望大江

大江來從萬山中山勢盡與江流東鍾山如龍獨西上
欲破巨浪乘長風江山相雄不相讓形勝爭誇天下壯
秦皇空此瘞黃金佳氣蔥蔥至今王我懷鬱塞何由開
酒酣走上城南臺坐覺蒼茫萬古意遠自荒煙落日之
中來石頭城下濤聲怒武騎千羣誰敢渡黃旗入洛竟
何祥鐵鎖橫江未為固前三國後六朝草生宮闕何蕭
蕭英雄乘時務割據幾度戰血流寒潮我生幸逢聖人

起南國禍亂初平事
休息從今四海永為家
不用長江限南北

春日客園無花偶感

荒園多青草而無一樹花
東風吹春來只向何人家
南池舊日花滿煙
美人夜彈蜀國絃
亂枝迷眼歸不得
醉帶月露花陰眠
無花雖足歎無酒更可悲
如今但得一壺滿
何用紛紛紅紫為

白下送錢判官岳

白門有垂楊復有春酒香此地逢君誰乃是錢少陽相
逢既沽白門酒相送還攀白門柳不向公車更上書却
趨官署初垂綬日落淮水頭送君去悠悠梁王苑裏花
飛盡明日相思過汴州

贈錢文則琴呈良夫

古樂久不聞古器亦殘缺惟有朱絃琴韻與箏瑟迴殊
別此夜聽君彈四座寂不喧古人有遺恨似向絃中言
初調乍冲融再弄忽悽惋秋猿春鳥相間啼夢遶瀟湘

碧雲遠怒濤勢出峽鬪石轟奔雷漫流入滄海悠然去
無回銅瓶一墮井汲引不可上離車軋軋曉出關欲行
未行苦惆悵夜深庭樹風雨驚恍疑鬼神入蒲城須臾
響靜月照席玉壺凍破冰崢嶸我心正如水萬籟不到
耳無端聽此聲雙淚迸落百感生起請且莫彈胡笳文
姬思家意咨嗟請莫彈履霜孝子在野愁彷徨願君拂
拭登高堂先彈南風後文王美哉大雅聲洋洋使我坐
聽憂俱忘

雪齋為述上人賦

君不見韓刺史疲馬度關愁欲死君不見党將軍美人
擁帳飲正醺憔悴豪華兩何有世人徒勞競奔走雪深
三尺坐寒龕誰似西齋衲衣叟開門一笑定起遲虛空
大地皆春熙松梢一片忽墮響夜靜山空人不知此地
應憐無熱惱尋梅莫若尋詩好便穿蠟屐踏瓊瑤曉徑
從埋不須掃

燕覆巢

雙燕生五雛怡怡向高屋雛飢母出風雨來新作深巢
竟傾覆主人念雛不解飛移之別壘待母歸雛雖得壘
燕勿喜相逢主人亦偶爾明年作巢當更好須信安居
最難保

五禽言和張水部

泥滑滑啼空山行人愁道路難高天浮雲自多雨人不
知還空怨汝

提壺盧趣沽酒杏花邨中媪家有君如不飲過却春此

鳥枝頭應笑人

郭公郭公天寒水空朝飛暮棲蒹葭中蒹葭中啼不息
千載魂應怨亡國

婆餅焦婆去餉孫田隴遙隴頭小麥穗已搖但願好收
食自饒爾莫憂婆餅焦

脫却破袴脫却破袴谿深無船須涉渡亦思脫舊復換
新春機已空愁殺人

約王孝廉看梅

君莫憶東閣吟我莫憶西湖見兩地年來信不通塵埃
正滿春風面不知山中三日雪掩局脩竹斜倚愁娉婷
讀書屋空滿梁月夢斷冷落畱餘馨相尋定有迎船鶴
煙霧籠寒縞衣薄一尊好共煖花魂明日關山笛中落

題滕用衡所藏山水圖

滕君興在煙霞間遠遊十年今始還畫圖示我有曾嶂
竟似何處之名山君言我初適東越酒船橫渡鏡湖月
醉詠謫仙天姥吟海光欲曙清猿歇瑤草春已生便入

金華行道逢牧羊兒疑是黃初平從此西遊楚江水大
帆如雲掛空裏控樓醜酒喚長風一日看山一千里不
聞東林鐘但見香爐峰波迷洞庭閣樹隔瀟湘重白沙
翠壁經過好就中幾度曾幽討麻姑壇上掃落花堯女
祠前薦芳藻晚客湖南逢鴈回登臨長上楚王臺天從
朱鳥峰頭轉江自黃牛峽外來蒐奇歷險今應倦默坐
舊遊空數遍時向明窗看此圖好山一一皆重見我聞
君言自歎嗟身如處女愁離家閉門讀書無半車髀肉

漸生空鬢華牀前塵土蔽雙屐何不著之踐苔石幸逢
盛世道路平五嶽尋真皆可適便當往抱綠綺彈松風
行盡萬壑千巖中仙書探得金匱空歸來誇君重相逢
握手一笑吳門東

余未有嗣海雲道人以張仙畫像見贈蓋蘇老
泉嘗禱而得二子者予感其意因賦詩以謝

我年已及壯吉夢未兆熊雖有三女兒豈足慰乃公每
聞鄰家子夜雨誦經史起坐秋燈前顧影長嗟不能止

道人念我書無傳畫圖卷贈成都仙云昔蘇夫子建之
玉局禱甚虔乃生五色兩鳳鶴和鳴上下遂與夫子相
聯翩勸我勤禮之當有明珠出深淵我感道人意捧觴
拜其前君不見東家翁力耕積多田平生辛苦立門戶
兩兒棄擲如浮煙惡兒亦何須願得一子賢上以承吾
宗下以與我玄仙乎有驗看明年請君更賦懸弧篇

大全集卷十一

欽定四庫全書薈要卷一萬六千六百二十三

集部

大全集卷十二

明 高啟 撰

五言律詩

草堂夜集

山家具雞黍夜與故人期
暫喜逢歡會都忘在亂離
火寒移坐密燭盡得詩遲
莫聽高城角明朝別又悲

過胡博士郊居

胡善

頭白蘭陵客幽居共一邨
老來吟力退貧去告身存
夕吹鳴梨葉秋泉注稻根
時因來問筮獨叩樹間門

送茅侯

欲知難別意孤棹去還停
候吏分遙邇離人雜醉醒
城臨秋水渡樹帶夕陽亭
後夜看吟燭憐君宿郡廳

孤鴈

衡陽初失伴歸路遠飛單
度隴將書怯排空作陣難
呼羣雲外急弔影月中殘
不共鳧鷖宿蒹葭夜夜寒

曉步園池

髮隨秋葉落心共曉雲舒
稍改新題句渾忘舊讀書
林爭移樹鳥池響食萍魚
無限悠然意涼天獨步餘

次韻過建平縣

縣雖三戶小地僻罷兵防
茶市逢山客楓祠祭石郎
雲埋鳴澗斧沙膠度谿航
應愛青山好經過駐旅裝

鵲軒

金華朱少府生時有鵲集
於庭後樹每歲生日

輒一來其母將死鵲悲鳴久之而去因以名軒
識其思母之意云

神鵲曉鳴枝飛來自有期門前懸矢日堂上捧樽時詎
信填河事寧歌繞樹詩只憐君望斷風木助餘悲

寄杜二進士

花開寄別離花落正相思交誼多年見鄉愁近日知我
方淹上國君豈老明時試問江干閣同登復共誰

雨篷

楚雨滿汀洲。瀟瀟灑灑客舟。夢驚孤枕夜愁掩。一篷秋葦。葉寒相戰。灘聲暗共流。此時湘浦上。同聽只沙鷗。

聽秋軒

西澗秋聲起。涼風助振號。數禽翻樹裏。萬葉下亭皋。初訝來山雨。還疑捲浪濤。老僧方入定。終夜任蕭騷。

杏花飛燕圖

雙飛如鬪捷。終日幾西東。尾拂花稍露。身翻柳絮風。入簾時趁蝶。歸壘每銜蟲。何處長相見。佳人院落中。

扇

皎皎復團團何人剪素紈驅螢臨几席撲蝶近闌干似
月驚朝見生風變夏寒時移當自棄莫怨繪乘鸞

新荷

如蓋復如鈿初生雨後天葉低浮水上莖弱裊風前乍
覆遊魚戲難藏宿鷺眠佳人休便折畱蔭採蓮船

鷺

雪羽獨脩脩閒情戀遠洲聲沈煙浦晚影度月灘秋避

棹驚時起窺魚立未休
蒹葭同夜宿應只許沙鷗

馬

名駒產渥洼牽出萬人誇
逸足輕千里高髮散五花
城南遊紫陌塞上踏黃沙
不受蠻奴策驕嘶向日斜

梧桐

井邊雙玉樹高結自生涼
影散秋雲薄聲喧夜雨長
疎英飄碧簾亂葉響銀牀
綠綺誰能斲持將奏鳳凰

圍碁

偶與消閒客圍碁向竹林聲敲驚鶴夢局罷轉桐陰對
坐忘言久相攻運意深此間元有樂何用橘中尋

池上晚酌

夕陽初雨過團扇送涼過竹裏方歸鳥沙邊尚浴鷺脫
巾懸峭壁流竿逐回波六逸當年樂何如此處多

簟

蠻藤巧織成乍展覺涼生紋感寒波細光搖夜月明坐
令葵扇棄眠稱石牀平須信南軒下炎天夢亦清

射柳

風煖畫旗張將軍集射場馬驕嫌轡急人勇喜弓強但
見青條折那知白羽翔三軍歡笑處巧中勝穿楊

流螢

熠燿復青熒流光不自停暗飛如避月遠墮欲隨星穿
樹臨幽檻緣莎集小庭莫將羅扇撲囊取照遺經

水殿圖

波影繞闌干清虛似廣寒荷香臨檻挹月色捲簾看夜

靜聞清吹涼多却素紈宴酣思薦鱠銀縷簇金盤

新蟬

翾翾乍離脫咽咽試初鳴隔葉棲身穩移柯忽意驚亂
催窗日墮微喚浦風生何待當秋聽今朝已感情

林間避暑

自愛蠻藤滑閒舒卧石苔松風催暑去竹月送涼來石
氣生琴薦泉香入茗杯却憐行路子愁暘向黃埃

送劉省郎出佐邊郡

符券前軍重衣冠上客才地圖連異壤星次出中台暮
雨車投峽秋風扇却埃省中梧樹在鳴鳳會重來

湓浦琵琶圖

秋夜相逢處閨愁雜宦情四絃風共拂兩棹月同明司
馬青衫溼佳人白髮生至今湓浦上楓葉尚哀聲

金人馬圖

名王愛遊獵初試射鵰弓白草秋原曠黃沙晚塞空琵琶
應漢女騷裹是胡驄歸醉葡萄綠穹廬在月中

夜訪芭蟾二釋子因宿西澗聽琴

清夜獨幽尋巖扉落葉深
許攜陶令酒來聽穎師琴
人醉月沉閣烏啼風滿林
應畱西澗水千載寫餘音

錢塘送馬使君之吳中

樟亭離席散遙發畫幡車
飛雉新阡麥啼鷺故苑花
望山登郡閣行水到田家
莫道凝香句前人獨可誇

與劉將軍杜文學晚登西城

木落悲南國城高見北辰
飄零猶有客經濟豈無人
鳥

過風生翼龍歸雨在鱗相期俱努力天地正烽塵

和周山人見寄寒夜客懷之作

亂世難為客流年易作翁百憂尋歲暮孤夢怯山空門
掩雲峰裏燈明雪竹中無因乘夜訪相慰一尊同

哭臨川公

身用已時危衰殘况病欺竟成黃犬歎莫逐白鷗期東
閣圖書散西園草露垂無因奠江上應負十年知

一窗秋影

脩竹與疎桐，秋陰接桂叢。
竝生金井側，同映綺疏中。
隱匿纔籠霧，交橫忽颭風。
不須懷故館，月落并成空。

早春侍皇太子遊東苑池上呈青坊諸公

銅輦出紆徐，春宮晝講餘。
戟煩郎將衛，簡授大夫書。
草長園鳴鹿，冰開沼躍魚。
從遊伴商皓，忝竊愧何如。

題谿山小隱

何處谿山隱，衡門對野橋。
晚風攜鶴子，春雨種魚苗。
小徑斜通竹，疎籬曲護蕉。
人生閒自足，不問楚辭招。

城西客舍送周著作砥

客中寒食後惆悵送君違
花隱歸城旆風吹渡水夜
窗炊黍散春苑鬪茶稀
誰念西齋雨相思獨掩扉

兵後出郭

俯仰興亡異青山落照中
民歸鄰樹在兵去壘煙空
城角猶悲奏江帆始遠通
昔年荆棘露又滿闔閭宮

謝賜衣

臚呼遙捧賜服拜望蓬萊
香帶爐烟下光迎扇月開
奇

卷十二
紋天女織新樣內工裁被澤徒深厚慙無奪錦才

西清對雨

楚臺雲起遠漢苑雨來微曉溼宮城
旆寒霑陛楯衣溝
中隨葉墮爐畔帶煙飛
坐詠西清暇君王召對稀

夜宿太廟齋宮

鳥散廟堦空清香肅闕宮太常齋禁密
列祖享儀崇井
叩銅瓶月墀鳴玉佩風聽鐘候車
駕庭燎已燿燿

送秦主客遷侍儀使

蕃客來曾識衣冠上國風
承恩趨北闕罷直出南宮
導駕爐煙裏催班漏點中
時清多奏頌還向閣門通

春日退直呈禁署諸公

待詔直東華歸休每日斜
職連詞客苑俸入酒胡家
檐網長縈絮庭磚欲過花
知君未出院應草侍中麻

送張司勳赴寶慶同知

乍出司勳幙還乘別駕車
按圖猶漢地輸布盡蠻家
山熱蛇懸樹江晴鶴浴沙
郡樓回首處北斗近京華

寓天界寺

雨過帝城頭香凝佛界幽
果園春乳雀花殿午鳴鳩
萬履隨鐘集千燈入鏡流
禪居容旅跡不覺久淹留

送前進士夏尚之歸宜春

淒涼庾開府老去復如何
故國歸鴻少新朝振鷺多
菊荒應自歎麥秀竟誰歌
相送堪愁思蕭蕭楚水波

早出鍾山門未開立候久之

闕吏收魚鑰趨朝阻向晨
忘鳴雞睡熟倦立馬嘶頻
柝

靜霜飛堞鐘來月墮津可憐同候者多是未閒人

雪夜宿翰林院呈危宋二院長

偶伴王摩詰寒宵宿禁林院鈴風外靜宮漏雪中沈絳蠟銷吟燭青綾擁賜衾明朝陪賀瑞銀闕曉光深

自天界寺移寓鍾山里

移寓鍾山里開軒見翠微寺僧違乍遠鄰父識猶稀愛讀明開牖防偷固設扉誰言新舍好畢竟未如歸

夜逢故郡賀冬至使胡普二博士同宿

會宿本無期，忻逢兩舊知。
問年驚別久，候曉畏朝遲。
寒澀高城漏，陽迴上苑枝。
明朝使事畢，歸騎又天涯。

至日夜坐客館

久客漸忘家，今宵忽感嗟。
旅蹤猶泊梗，陽氣又吹葭。
巷屋門封雪，鄉關路遶沙。
閨中想逢節，也解憶京華。

送鮑翰林遷官陝右

鑿坡初罷直，西去惜離羣。
載筆唐供奉，褰帷漢使君。
濁流河驛雨，高樹嶽祠雲。
公暇應懷古，登臨賦夕曛。

送姚架閣

芳晨悵別筵，新柳驛亭前。
客散春城酒，人登暮雨船。
江樓先見日，郡界遠臨邊。
到後安民俗，應知從事賢。

送曾主簿之平樂

路出桂江東，鄉音想未通。
蛇飛山苦霧，鵬運海多風。
木魅長欺客，花蠻少學農。
縣廳何處在，椰葉晚陰中。

桓簡公廟

荒林慘淡中，石馬欲嘶風。
功在山畱碣，威存廟挂弓。
飢

卷十二
鴉迎祭客走鼠駭巫童千載宣城道人憐內史忠

送陳則

挾策去誰親侯門不禮賓愁邊長夜雨夢裏少年春樹
引離鄉路花驕失意人一杯歌短調相送欲沾巾

暮春送陳郎中出守樵李

出幙方為郡行車動畫輪圖書歸省吏風俗問州人塘
水龍鱗細城槐兔目新莫言花已盡君到自陽春

送楊從事從軍

南風動燕麥送子悵如何迢遞戎車役淒涼橫笛歌天
籠平野迴山繞古關多莫笑書生怯能當曳落河

送王員外遷崇教

能書晉公子清宦稱高情海樹朝帆遠江風夏服輕官
從三省去僧出萬山迎誰說簪纓累名林得按行

吳中送顧生歸海陵

涼風初變柳歸興片帆孤家向三秋到田經幾歲燕鶯
音猶帶楚新夢未離吳明日江南北相思有雁無

園中

席煖林中憩衣涼水上歸腐瓜蟲食徧空樹鶴巢稀
邂逅幽尋得參差薄願違喜無來往者秋草沒園扉

送前國子王助教歸臨川

去國獨依依羈臣淚滿衣夢中燕月遠望裏楚山微
世變人驚老身全詔許歸舟前楓葉落應到故園扉

送潘巡檢之閩中

京師到閩海秋色幾程餘莎柵山兵守榕林島戶居
曉

衙雞應鼓晚邏騎隨車清世元無盜將軍好讀書

送思上人

名林雖盡廢南去只隨緣野飯晨畱鉢城鐘夜到船
虎馴應畏法鳥喚不驚禪他日期相見高峰舊塔前

宴王將軍第

流水通侯第行雲傍妓臺雨催牙仗散風引羽觴來
曲學移聲按詩隨得韻裁莫令遊宴歇次第過花開

送朱從事之吳興

釋褐方從宦青山故郡鄰草深湖帶雨花暗驛藏春鼓
聚祈雉蟲女舟逢射鴨人幙中應待久徒此惜離辰

和友人過采石

山暝斷磯頭猿聲兩岸愁柳間娼女酒月下估人舟
擒虎嗟橫渡騎鯨憶醉遊停橈正懷古風急葦花秋

謔柳

何恨苦長顰纖姿嫵媚春慣愁行路客羞比舞筵人亂
葉斜斜雨狂花裛裛塵殘蟬來噪日應落漢潭濱

無題

顧影出中堂，長看學內妝。
本為戚里婦，不是狹斜娼。
扇撲園中蝶，箏彈陌上桑。
相逢不敢笑，只恐斷君腸。

京師寓廨三首

誰言舊隱非靜里，且相依綠樹城。
通苑青山寺對廨，官閒休直早客久。
夢還稀是物，春來典唯存舊賜衣。

其二

幾夜頻聽雨，經春不見花。
蘼蕪青渚燕，楊柳白門鴉。
拙

官危機遠工吟癖性加閒坊車馬少不似住京華

其三

寂寞過芳時幽懷只自知袖無投相刺篋有寄僧詩鼠
跡塵凝帳蛙聲雨到池疎慵堪置散不敢怨名卑

送舒徵士考禮畢歸四明

寄語關門吏休輕尚布衣叔孫聊應召周黨竟辭歸赤
日京塵遠蒼煙海樹微送君還自歎老却故山薇

陪客登陶丘

相逢俱失意此地偶同遊
獨樹邀人去斜陽為客留
依邨煙景夕近水竹聲秋
謾有歸歟歎何山是故丘

王公子宅五月菊

秋英忽夏發宛在阿戎家
細認驚初見高吟喜共誇
不依寒竹雨欲映午榴霞
我意甘遲暮尊前有此花

送周復秀才賦行李中一物得紈扇

不畫乘鸞女應憐素質新
霜機驚落早風塵讓揮頻
席上曾歌怨窗間或掩顰
何如為君子遠路障埃塵

送流人

漢條應偶觸蠻俗未能諳海近風多颶山昏瘴似嵐行
衝哀向虎食畏蠱家蠱鄉國何年返縣知老日南

贈張省郎

漢署早為郎長遊鳳沼傍雞知壺水候馬識火城光每
載趨曹筆時熏直省香邊書無一羽冠蓋得翱翔

送瀚公住靈巖

離宮遊路絕名寺道場開我昔題詩去師令說法來茱

莫垂澗戶菡萏發池臺興壞俱空幻登臨不用哀

送宿衛將出守鄧州

中郎身領仗宿衛在承明舊射雙鷗落新乘五馬行紅
雲遙魏闕白水近穰城好勸諸年少春來賣劍耕

甘露寺

勝地江山壯名林歲月遙刹藏京口樹鐘送海門潮月
黑龍光發天清蜃氣銷何當尋狼石閒坐話前朝

送張羽後夜坐西齋

閒齋聽鐘坐憂緒
悵多端鳴鴈雨中急
離人江上寒秋
燈下木葉夜艇隔
風湍別後情蕭索
方知舊會歡

徐山人別墅

茶香孤墅發竹色四鄰分
掃地侵蟲字開窗散鳥羣
樹涼池過雨苔潤石生雲
我出無車馬偏宜訪隱君

客館秋懷

獨卧愁空館牆陰野豆開
暑將潮氣斂秋與竹聲來
身賤多違志時清少棄才
慙非張仲蔚門戶有蒿萊

秋夜宿周記室草堂送王才

相別還相戀，秋宵暫對牀。
人情貧後見，客況醉中忘。
池柳疎含吹，江雲薄護霜。
離舟待明發，愁思劇茫茫。

江上雨

冥冥衆樹昏，浩浩一江渾。
急有迴風韻，輕無入霧痕。
鳥啼叢竹嶺，人卧落花邨。
門巷春泥滑，誰來共酒尊。

送賈二進士歸省

年少擅詞華，曾看手八叉。
晨裝歸路雨，春酒別筵花。
馬

帶雲過嶺人同燕到家罷官趨覲好不是謫長沙

贈演師

石橋尋禮罷歸住白雲層法悟經慵讀年衰塔倦登青
苔生砌錫黃葉翳龕燈我欲相依老前身恐是僧

送錢氏兩甥度嶺

吏送投荒去應歸下瀨營一家十口散萬里兩身行洞
獠欺商市山魃喚客名江邊南望泣不盡渭陽情

送客歸閩省覲

秋城間暮砧歸思忽盈襟客久依人遍親衰念子深青
山多嶺路紅荔到鄉林菽水還堪樂何須季子金

圓明佛舍訪呂山人

憐君不出院結夏與僧同陰竹行廊遠香花掩殿空飯
分齋鉢裏書寄藏函中茶宴歸來晚西林一磬風

荅宗人廉夜飲王氏池亭見懷

遙聞池上酌涼夜失炎天酒碧傾當竹衣香坐近蓮沿
波人弄月翻樹鳥鳴煙座上誰相憶惟應是惠連

賦得蟬送別

疎槐細柳中涼占一枝風蛻出形猶弱驚飛響未終雨
來林館靜日下驛門空離管尊前發淒涼調正同

何隱君小墅

移家營別墅一逕竹扉開泉滿疏渠放花多借地栽壁
間田器挂窗裏浦帆來自戀幽居樂誰言是棄材

贈張明府

聞道彈琴處門前柳帶沙海珍通估市湖稅減漁家暮

港迷荷葉秋田間豆花亂來無此地君政亦堪誇

送唐博士肅移家樵李

楊柳發初齊春陰廢苑西故人乘醉別新鳥傍愁啼舟
重全家去詩多一路題杏花開北郭誰復共招提

贈妓

樂籍小名收侯家舊主謳笑能撩客喜醉肯逐人雷蝶
識薰香氣鶯慙度曲喉更憐諳酒令少日住揚州

送顧倅之錢塘

之官即勝遊送別漫多愁草色荒宮燕槐陰遠驛駒湖
通朝汲井潮動夜眠樓早向臨平過荷花已欲秋

荅高廉同飲後見寄

竹林清暑宴客散獨歸時愁寄歡餘別醒慙醉後詩蟬
催斜景急鳥度廣川遲何事聞鐘處勞君尚遠思

沈徵士鉉野亭

清時猶在野獨卧見高情移艇聞煙唱鉤簾看雨耕江
晴雙鶴下樹晚一牛鳴回首徒相憶柴車不入城

題醫師王隱君墓表後

孤舟別楚水
客鬢已蒼蒼
竟賦招魂些
虛傳續命方
悲風柏隴小
積雨藥園荒
生滅雖能悟
看碑亦感傷

贈朱山人

老來嫌衆累
依澗獨開房
積雨苔生桁
迴風葉滿牀
學僧持淨律
避客錄竒方
若問塵中事
無聞不是忘

谿上

秋色共谿長
遊人語笑涼
萍開天倒影
蓮墮水流香
魚

留和星流禽置帶雨張從今搖桂棹不必問瀟湘

次韻楊儀曹雨中

雨中池閣曉清簟薦文漪陰恐晴期遠寒疑暑候遲荷
高擎欲折柳重舞難歌應阻陪高詠開簾看散絲

寄錢塘諸故人

年少客名都狂遊每共呼荷深箬在舫竹靜夫鳴壺明
月潮千里殘陽雨半湖故人能念否歡意近來無

送烏程馮明府

青山若下南一騎入晴嵐
縣治琴聲古泉香酒味甘
竹欄春護鴨葦箔夏分蠶
大小馮君後傳家爾最堪

喜了上人見過

幾時西澗別忽喜過家園
澹泊林間供虛空世外言
豆花零晚架瓜蔓絡秋垣
莫厭頻相過衡門久息喧

病目

閉目洗黃連深窗坐兀然
未忘聽鳥興暫絕看花綠
問女知檐日嗔奴畏竈煙
願因無見處得證定心禪

病目不飲

患目未全明醫教謝麴生暫從彭澤止恐學左丘盲
下蘭尊掩林間藥白鳴坐聽連日雨何物慰閒情

賦得蟹送人之官

吐沫亂珠流無腸豈識愁香宜橙實晚肥過稻花秋出
籩來深浦隨燈聚遠洲郡齋初退食可怕有監州

江上早發

蒼蒼汀霧起何處望高城游子曉初發居人寒未耕犬

鳴林月落魚躍浦風生已有先行者煙中間棹聲

客舍喜姪庸至

客裏逢人喜相過况阿宜遠游驚歲晚多難惜門哀帆
落江橋近鐘來野店遲一杯燈下語渾似在家時

哭周記室

萬里一羈臣悲歌楚水春漫期重會面竟作永傷神主
祭唯孤姪收詩有故人獨揮聞笛淚斜日下西鄰

過永定廢寺

亂後僧何去門閒落葉時
晝昏秋蠹老齊斷午禽飢
罷說傳心法猶看賜額碑
不知興壞理來此豈無悲

楓橋送丁鳳

紅葉寺前橋停君晚去
橈醉應忘世難歸不計程
遙山隱初沉日風催欲上潮
離魂來此處還似灞陵銷

盜發漢侍中許彧墓

古冢竟誰穿虛傳錮最堅
玉魚宵已出石獸曉猶眠
長夜俄看日幽臺不掩泉
湏知摸金者亦到漢陵前

過海昌贈李侯

閒廳畫下簾秋色滿疎髯久戍殘兵老多貧長吏廉陰
風潮動郭晴日地生鹽三老相逢說年來戶牖添

送易從事祖飲南渚

疎楊映老荷別處最秋多送客年年路愁人日日波霞
明添醉色風急斷離歌莫為官程促青山易看過

題張靜居畫

楚客寫荆岑秋雲隔浦陰人家連橘塢水廟映楓林亂

後清遊歇愁邊遠色深相看休向晚怕有峽猿吟

夜懷王校書

燈暗獨吟餘疎桐月滿除蟲寒初入戶鼠餓欲侵書河
漢三更望江湖兩地居相思無去夢今夜恨何如

荅陳則見寄

何由慰遠思獨詠寄來詩行路方難日清秋欲盡時江
多驚鴈火樹少宿烏枝早晚如相見應憐有鬢絲

煮藥

葉燥井泉清
山窗藥在鐺
燈前看火候
枕上聽潮聲
味熟吟方就
香來病已輕
何時采芝朮
養得羽翰成

夜投西寺

江月上秋衣
來敲遠寺扉
栖禽驚客至
睡僕訝僧歸
鐘度行廊盡
燈留浴院微
非無招旅館
禪寂願相依

送石明府之崑山

茂苑行春罷
攜琴又向東
潮聲數里外
山色半城中
帆帶桃花雨
衣翻柳葉風
島夷聞善政
為有舶船通

過城西廢塢

亂前遊最熟，亂後問都迷。
園散栽花戶，林荒采菊蹊。
廢泉流圃淺，斜日下城低。
唯有煙中鳥，迎人似舊啼。

送范架閣赴嘉禾兼簡李使君

陸相祠前路，孤舟欲上時。
空江難晚別，荒郡易秋悲。
月送潮生早，雲隨鴈去遲。
幙中知有子，太守只題詩。

喜呂山人見過江館

非君憐夙契，誰肯顧柴門。
日短清江路，風高大樹村。
交

呈新著稿同發舊藏尊莫便尋歸棹心懷未盡論

贈鄰友

同居一塢中只隔水西東林近書燈露溪迴酒舫通
放鳧長合隊移竹每分叢只恐君徵起難期作兩翁

雨中就陳卿飲酒醉歸聞丁一卧病客樓酌慰之
我醉聽歌後君愁卧病中山雲秋郭暗江雨夜樓空短
燭知頻剪清樽恨不同題詩非檄手那得愈頭風

送醫士宋君之江上

詩瓢與藥囊此去即行裝跡隱名猶在交親意未忘別
芸緡舊帙嘗草識新方春水孤舟起還來問竹房

屏居

飲水依道者心清無衆喧幽花落半樹疎雨過荒園看
山易云夕尋澗偶窮源欲喻靜中趣居然忘我言

立秋

碧天收夏色節氣變清商暑自今宵伏風從此日涼金
莖初有露玉氣未成霜暝日并淒雨潛催草木黃

效唐人贈邊將

翩翩越騎將負勇出山西射虜誇猿臂封侯賭馬蹄候
烽河外暗伏幟草中低欲雪憑陵恥須禽左谷豕

送董湖州

五馬貴專城花兼赤綬明政條民乍識賦籍吏初呈山
籠輸茶至溪船摘芟行非將茗雪水誰比使君清

晚次西陵館

匹馬倦嘶風蕭蕭逐轉蓬地經兵亂後歲盡客愁中晚

渡隨潮急寒山舊驛空
可憐今夜月相照宿江東

送顧別駕之邊郡

故人雖盡別相去獨君賒
緣路雲千堆臨邊樹一家渡
江船載馬到館燭驚鴉
莫歎孤城廢春來尚有花

送僧恬歸靈隱

遊方應未久柳色變新年
在路逢春雪還山訪冷泉
鐘催投寺錫燈照泊江船
法意休多問無言即是禪

江上寄王校書行

寥落舊歡違江邊獨掩扉鄰家聞暮笛客舍試春衣宿
鳥歸山亂行人渡水稀相思比花絮斜日繞城飛

送越將罷鎮

楚客佩吳鴻臨邊最有功讀書圍壁裏賭酒射堂中旆
出蒞城雨笳吹柳浦風越人相感意應與暮潮東

送王稹赴大都

王郎歌莫哀且酌姑蘇臺獨客自傷別諸侯誰愛才關
河千里去宮闕五門開未肯輕齊虜新從下土來

送孫主簿之德清

孫善琴

山水匝秋城君行思已清道逢迎吏拜田雜戍人耕地
遠知邊信家貧稱縣名應攜一琴去相和長官鳴

畱別李侯

梅發津亭北春隨使節迴線多遊子服酒滿故人杯鐘
送橫江雨車盤出峽雷平生感知已臨別更徘徊

寄熹公

禪居紫閣陰欲去問安心野岸隨流曲山門隱樹深千

燈燃雨塔一磬出風林想見跣趺處雲多不可尋

送王才歸錢塘

南歸猶落魄北上已蹉跎草草官亭酒勞勞客路歌親
知今日少山水故鄉多七首空畱在酬恩竟若何

送長洲周丞陞吳縣令

青山隔苑橋改邑去非遙官食新添俸民傳舊布條稻
花迎午放荷葉待秋凋寂寞長洲路空聞五袴謠

冬至夜喜逢徐七

金
卷十二
君來同客館把酒夜相看動是經年別能辭盡夕歡雪
明窗促曙陽復座銷寒世路今如此懸知後會難

送史丞之海門

史淮
東人

黃茅連霧雨此地久荒涼日出岵夷通江通渤澥長改
官非謫宦到邑是還鄉海上遙聞說歸人已裹糧

夜雨

砌冷一蛩急窗虛諸葉稀蕭條風雨夜幽卧掩牀幃鄰
杵聽初歇齋燈看尚微忽憂歲暮事聊食故山薇

師山周君客濠上思歸未得因畫舊隱圖求余
賦詩

幾年畱客舍千里念家山得向圖中見猶勝夢裏還
畦經雨廢薜屋帶雲闔楚奏無窮意相忘賴此間

徵恙江館夜作

寒燈坐江館愁逼歲闌珊苦恨應催老微疴似忌閒
雞前星列屋鴈外月臨灣明日將求藥身猶懶入關

逢李止冰道人

吹簫月滿舟何處昔頻遊后土瓊花觀仙人黃鶴樓別
來應未老道在復何求相見俄還去江城楓葉秋

冬至夜雨感懷

節序闕何事徒令百感生升沉當世事存歿故人情寒
壯微陽氣風疎緩漏聲他年說今夜聽雨宿南城

過戴居士宅

江邊戴顓宅地好悵幽尋高樹藏卑屋新篁補舊林烏
成畱客語雲作護花陰不負滄洲約重來論夙心

歸鴉

啞啞噪夕暉爭宿不爭飛未逐冥鴻去長先野鶴歸荒
村流水遠古戍淡煙微借問寒林樹何枝最可依

晚坐南齋寫懷

鴈過南齋暮魂消默坐中賤負長作客愁病欲成翁窗
灑侵燈雨庭翻走葉風山妻猶解事未遣酒樽空

其二

歲景看垂暮羈踪歎屢遷有身能去俗無術但論天菊

老江城酒牀寒客舍穩愁中還一笑兒女滿燈前

臘月二十四日雨中夜坐

不興貧後歎每動醉中吟涉難知天意居閒長道心鴈
聲隨雨到鬢色與年侵獨想平生事蕭然坐夜深

其二

身退惟宜靜謀疎且任真樓空三日雨書亂一牀塵丘
隴多良友江湖獨放臣莫嗟年景暮轉眼是新春

書曹谷才世訓詩後為其子季常作

綠野高人第清門舊相家篇章存月露翰墨走龍蛇作
戒言惟切詒謀歲已賒過庭雖有訓得與共傳誇

題畫為僧賦

行負貝多書青山別舊廬亂尋安土避貧借破菴居吟
苦非愁裏禪癯似病餘思歸休看畫來去盡空虛

題華氏瑞檜圖

誰指牛眠處江山地最靈氣鍾孤檜碧祥表五芝青影
動春雲亂香敷曉露零知君家種德曾讀墓前銘

樵

山中朝佩斧遠路入煙蘿
伐木驚禽起穿雲畏虎過
石根供倦憩谷口應高歌
莫看仙人奕歸來恐爛柯

牧

自誇黃犢健登隴共揮鞭
笛弄將斜日蓑披欲斷煙
歸鴉流水外疎樹舊莊前
應笑侯門客騎驢走歲年

賦得銅人贈醫士

舊鑄明堂像新圖太史書
體成金冶內穴試石砭餘摩

狄年空老求仙事亦虛君懷濟人意為此竟何如

夏景園廬

門掩一齋空幽懷獨坐中本同趨府客偶似灌園翁魚
闔萍溪雨蟬嘶柳巷風未須論夙志聊復去樊籠

寄題崇明學宮天心水面軒

夜氣虛明際齋宮息衆喧詠餘風度瑟坐久月當軒雲
盡無畱翳池清有活源心知此時意欲論竟何言

送柔上人得船字

叢林初結夏東去又飄然罷說天台講行參雪竇禪殘
經松下几遠磬月中船不用空悲別師今絕妄緣

中秋琵琶洲宴集得紅字

香霧夕濛濛孤高桂樹東影疎林際月涼近水邊風重
露流盃綠繁星亂燭紅明年江海上高會與誰同

悼女

保養常多闕艱難愧我貧悽悽臨歿語的的在生親遺
佩寒江月殘燈夜室塵中郎他日藁畱付與何人

亂後經婁江舊館

此地昔相依，重來事已非。
新年芳草遍，舊里熟人稀。
遠燕皆巢樹，閒花自落磯。
遺蹤竟難覓，愁步夕陽歸。

悼故顧宜人

避亂應千里，悲離復幾年。
塵埃初嫁鏡，雨雪未歸船。
有子隨行旆，無人與葬錢。
束芻何處吊，哀草暮江邊。

過劉山人園

欲問幽棲處，花蹊逐澗迴。
夕煙羅幙卷，春雨藥房開。
野

鶴知琴意山蜂給酒材城中少間客誰解引車來

次韻楊禮曹移疾之作

養疾深扉掩還應謝俗交鳥多風和語葵晚雨絨苞印
向閒廳鎖鐘聞近寺敲相思愁莫過高樹古城坳

送周履道入郭

離羣方感愴况復與君違花隱歸城旆風吹渡水衣
須知喧寂異莫訝往來稀今夜空齋雨誰憐獨掩扉

雨齋獨坐寫寄友

動與世相妨，端居學坐忘。
雨來池上樹，煙起竹間房。
屋鳥非晴弄，闌花是晚芳。
尋山期已阻，遙望奈蒼蒼。

次韻酬西園公

林驚綠樹鼠，池響食萍魚。
月戶雙砧落，風亭一簟舒。
體便清夏健，髮映早秋疎。
本自無愁事，何煩酒破除。

聞鄰家琵琶有感

清唱合琵琶，當年碧玉家。
弄殘催酒急，抱重向燈斜。
久別愁江樹，重聽隔院花。
淚多思舊事，不是客天涯。

書王生扇

素質粉藤光蒲葵詎可方
當懷驚抱月灑面怯沾霜
宜助驅蠅用羞隨走馬
狂過時甘自棄不怨井梧黃

送胡鉉遊會稽

山水獨行遍苕溪仍剡溪
衣逢新火減舟渡雜花迷
黃絹尋碑讀紅裙賭墅攜
清遊不能共腸斷聽猿啼

送陳少府赴嘉定

雨歇桑陰路爭迎紺幃車
潮多田水滿城小井煙疎
夜

戶猶聞犬春濤欲上魚期君布新政去卜海濱居
報恩寺逢蔣主簿就送還如皋

貪語酒寒頻新年見故人別時煙寺晚歸路雪江春造
次燈前面蒼茫船上身明朝楚花發莫歎縣廚貧

贈姚東曹

爐氣拂春衣分曹直省闈相門旄節重郎舍簡書稀夜
直聽鐘度晨朝策馬飛共憐王掾少粉署有光輝


鍾山雲霽圖

山勢識龍蟠香臺擁翠巒草堂猿嘯晚蕙帳鶴驚寒雲
擁梁僧塔苔封宋帝壇昔年遊歷處今向畫中看

白蓮寺池上

露已白荷花香滿池高僧愛清夜畱客坐題詩竹
驚夢草涼蟲語悲閒齋一瓢酒應不負幽期

大全集卷十二



總校官庶吉士臣張能照

校對官檢討臣蕭九成

謄錄貢生臣傅瓌芳